



## Umesuscht isch Fruscht

10, 30, 50 und 90 Prozant  
oder umesuscht emänd  
das isch der hittig Sääge  
wo mir alli dermit dien lääbe  
wer do nyt will verpenne  
duet dääne Aggzione nocherenne

D'Richtig isch klaar  
und alli meine: wunderbar  
me duet bi allem Profidiere  
zem jo kai Gäld z'verliere  
vor allem isch es wichtig  
as mer alli seggle – in die gliichi Richtig  
Sogar d'hundertjeerige Rybyyse-Bangge  
schmiere dr uf d'Schnitte dä siesi Angge  
dien dr verspräche – es sig e Hit  
kasch d'Jungfrau bestiige fascht fir nyt  
am Änd bisch aber nit uf dääre oobe  
nai, de muesch bim Hardermannli proobe

De hesch jetzt au e Profit- oder Kummuluskarte  
fir d'Lääbensmittel und au d'Nonfuud-Sparte  
eso fillsch in regelmässige Interwall  
d'Stuube mit Bäbi und d'Käschte mit Kristall  
und merggsch denn – as die wo das wänn  
allewyl s'Dupfeglyyche hän

Au bim Delifoniere  
duesch di nit schiniere  
kaufsch d'Leischtig bi dääne Strateege  
wo dr saage: mir dien Di nit leege  
am Änd vom Monet hesch aber Hellequaale  
will de jo d'Rächnig sottisch zaale

Dreimool umesuscht kasch au Zytige lääse  
si wärde yberall verteilt e jedem Wäase  
finde kasch si au in jedem Drämmli  
deert wirft me si furt nach em Lääse nämml  
s'isch egal fir welli as Du di duesch entscheide  
drin stoot s'Gliiche in Dääre – odder de andre Baide

De dänggsch der, will de duesch maine:  
jetzte mach-I ebbis fir mini liebe Glaine  
si solle Kontakt ha mit alle yber s'SMS  
fir Di beditet das aber scho SOS  
griegsch denn d'Quittig – reagiersch grad stur  
mini Junge mien sofort in d'Entgweenigskur

Und jetzt-e muesch no zer Kenntnis nä  
was es mit SMS no alles so ka gä  
es kunnt e neyi Mäldig aa  
lyt mr doch zrugg du liebe Ma  
frindlig wie de bisch duesch das au mache  
denn mergsch erscht – I bi glaub; nit ganz bache

E fyyni Stimm nimmt di Aaruef entgege  
de dänggsch – do will mi ebber leege  
no langem Hi und Här  
mergsch efang fir wär die Mesitsch wär  
mit me Freyer will die Schiggse jo wärche  
und d'Delifoon-Minute muesch Du aber blääche

Au s'Fasnachts-Comité duet sich reege  
und meeht au ebbis Neys bewege  
allerdings in die umkeert Richtig  
es sig line schambar wichtig  
zem d'Comité-Kasse z'rette  
mache si statt Ainere – grad drey Blaggedde

Yberall wo de aaneluegsch heisst-s mir sin billig  
und Du keisch yyne und bisch willig  
us reinem Eergiz und Yykaufhischterie  
b'schtellsch PCs, CDs, Meebel und au Lingerie  
stapplesch dehaime denn alles – yberall  
will de das jo bruchsch – in jedem Fall

Denn verlierst ändgiltig di Seelefrüide  
will yberall so Usschusswaar duet ummeliige  
vor luter däm Aggzione-Grimpel  
mergsch – was bin Ich fir e Simpel  
wirsch veruggt und verziescht dini Miine  
die wänn mi jo alli yyneliime...

D Ladärneuusstellig isch vom Mändig znacht, em 5. Merze,  
bis am Mittwuch demorge, em 7. Merze, fir alli Bsuecher  
gratis offe uff em Minschterplatz.

Drugg: Basler Zyttig